

ILUARSIISSUT

Siunnersuut 1. april 2026-mi tunniunneqartoq taarserpaa
(Inatsisinut periutsit atorlugit iluarsissutit ilanngunneqarput, matumani siunnersuutip § 16-
ianik tunngavissamik iluarsissuteqarneq ilanngullugu)

Uunga siunnersuut:

**Takornariartitsinermik ingerlataqarneq aamma inuussutissarsiutigalugu
ingerlatsinermi zonenut immikkoortiterineq il.il. pillugit Inatsisartut inatsisaata
allanngortinneqarnera pillugu Inatsisartut inatsisaat**

(Immikkut akuersissummik pissarsisinnaanerup, nalunaarsuisussaataanerup aamma
upernarsaasussaataanerup il.il. annertusineqarnerat)

§ 1

Takornariartitsinermik ingerlataqarneq aamma inuussutissarsiutigalugu ingerlatsinermi
zonenut immikkoortiterineq il.il. pillugit Inatsisartut inatsisaanni nr. 62, 25. november 2024-
meersumi tulliuttutut allannguisoqassaaq:

1. Maleruagassap taaguutaa ima oqaasertalerneqassaaq:

”**Takornariaqarneq, zonenullu immikkoortiterineq pillugit Inatsisartut inatsisaat**”.

2. § 1 ima oqaasertalerneqassaaq:

” § 1. Takornariartitsinermik ingerlataqarnermut Inatsisartut inatsisaat atuuppoq.

Imm. 2. Inatsisartut inatsisaata kapitali 9-a malillugu malittarisassat atuutsilersinneqartut,
takornariartitsinermik ingerlataanatik inuussutissarsiutigalugu ingerlatanut allanut aamma
atuussinnaapput.

Imm. 3. Inatsisartut inatsisaata kapitali 9-a malillugu malittarisassat atuutsilersinneqartut,
inunnut maani aalajangersimasumik najugaqaratik nunami angalasunut imaluunniit
akunnittunut aamma atuussinnaapput.

Imm. 4. Sumiiffinni nunami aalajangersimasuni takornariartitsinermut
akuersissuteqartarnissaq pillugu Inatsisartut inatsisaat malillugu akuersissutini ingerlatanut
Inatsisartut inatsisaat atuutinngilaq.

Imm. 5. Inunnut imaluunniit inatsisitigut pisinnaatitaasunut pisussaataitaasunullu, Kalaallit
Nunaannut imaluunniit Kalaallit Nunaannit imaluunniit Kalaallit Nunaata iluani inunnik
angallassinermik taamaallaat suliaqartunut, tassunga atatillugu takornariartitsinermik
ingerlatsisoqartinnagu, Inatsisartut inatsisaat atuutinngilaq, taamaattoq tak. § 15.

Imm. 6. Inuussutissarsiutit inatsisartut inatsisaannit matuminnga ilaatinneqartussaannngitsut

pillugit Naalakkersuisut aalajangersakkanik ersarinnerusunik aalajangersaasinnaapput.”

3. § 2, imm. 1, ima oqaasertalerneqassaaq:

” Inatsisartut inatsisaanni matumani takornariatitsinermik ingerlataqarneq ima paasineqassaaq, pingaarnertut takornarianut aningaasaqarnikkut ingerlatat aamma ingerlatsinerit, Kalaallit Nunaanni misigisaqartitsinissamik iluseqartumik sullissinermik neqerooruteqarnissamik siunertaqartut.”

4. § 3, imm. 2, ima oqaasertalerneqassaaq:

” *Imm. 2.* Inunnut imaluunniit inatsisitigut pisinnaatitaasunut pisussaatitaasunullu, §§ 7-mit 10 ilanngullugu malillugit piomasaaqatit naammassinnittunut imaluunniit kapitali 6-imi malittarisassat malillugit immikkut akuersissummik tunineqarsimasunut, Naalakkersuisut akuersissutinik tunniussissapput. Takornariatitsinermik ingerlataqarnissamut akuersissut, tamanna immikkut ittumik pissutsit pissutissaqartippassuk, piffissamut aalajangersimasumut killilerlugu tunniunneqarsinnaavoq.”

5. § 3, imm. 4, atorunnaarsinneqassaaq.

Taassumap kingorna imm. 5 aamma 6, imm. 4 aamma 5-inngussapput.

6. § 4-mi imm. 3-p kingorna immikkoortut nutaat 4-6 ilanngunneqassapput:

” *Imm. 4.* Piomasaaqatit allanngortinneqarnissaannik akuersissutaatillit qinnuteqarsinnaapput, tamanna piffissami akuersissuteqarfiusumi pissutsit allanngortut pissutissaqartippassuk.

Imm. 5. Pissutsini imaluunniit atugassarititaasuni akuersissummik tunniussinermut tunngavissiiisuni allannguutit suulluunniit, pissutissaqanngitsumik kinguarsarani Naalakkersuisunut ilisimatitsissutiginnissaannut akuersissutaatillit pisussaaffeqarput.

Imm. 6. Imm. 5-imi paasisitsisussaatitaaneq naammassineqanngippat, inatsiartut inatsisaanni matumani malittarisassat naapertorlugit akuersissut utertinneqarsinnaavoq imaluunniit allanngortinneqarsinnaavoq.”

7. § 4-p kingorna ilanngunneqassaaq:

” **§ 4 a** Uumasut artit immikkut illersugaasut eqqarsaatigalugit uumasunik nujuartanik takusassasiortitsilluni takornariatitsisarnermut, taamatullu ingerlatsineq soorlu nannunik takusassarsiortitsilluni takornariatitsinermi immikkut pissusilersorluni ingerlanneqartussaataillugu takornariatitsisartunut Naalakkersuisut immikkut akuersissutinik tunniussissapput.

Imm. 2. Imm. 1 naapertorlugit akuersissutini, pineqaatissiiinernik tunniunneqartuni piomasaaqatit pillugit Naalakkersuisut malittarisassanik ersarinnerusunik aalajangersaasinnaapput.”

8. § 7 ima oqaasertalerneqassaaq:

” **§ 7.** Suliffeqarfik inummit ataatsimit ingerlanneqartoq takornariartitsinermik ingerlatap CVR normuanut akuersissummik taamaallaat tunniunneqarsinnaavoq, piginnittoq:

- 1) Kalaallit Nunaanni inuit allattorsimaffianni nalunaarsugaasimaguni,
- 2) Kalaallit Nunaannut tamakkiisumik akileraartussaataaguni, aamma
- 3) nammineq pisuussutiminik tamakkiisumik atuisinnaaguni aamma akiliisinnaajunnaarnek-, akiliisinnaannginneq- imaluunniit atorunnaarsitsineq pillugit suliaqarfigineqanngikkuni.

Imm. 2. Piginnittut pisortani sulinerminnut atatillugu, ilinniarnerminnut, ilisimatusarnerni, inuiaqatigiinnullu iluaqutaasussamik ingerlatanut peqataanerminnut imaluunniit sivisuumik napparsimanerminni katsorsartinnerminnut atatillugu Kalaallit Nunaata avataaniikkallartut, imm. 1, nr. 1 aamma 2-mi piumasqaataasunut ilaatinneqanngissinnaapput.

Imm. 3. Imm. 2-mi pissutsit taaneqartut kingunerisaannik piginnittup aappaasa imaluunniit inooqataasa Kalaallit Nunaata avataaniikkallarnerni imm. 2 assinganik piginnittunut atuuppoq.

Imm. 4. Imm. 2-mi taasatut Kalaallit Nunaata avataaniikkallarnermut imaluunniit allamik ingerlatsinermut imaluunniit ingerlatamut uppernarsaat, Naalackersuisunut takutinneqarsinnaassaaq.

9. § 8 ima oqaasertalerneqassaaq:

” **§ 8.** Suliffeqarfik inummit ataatsimit ingerlanneqarani, tak § 7, inatsisitigut pisinnaatitaasumut pisussaataasumullu takornariartitsinermik ingerlatap CVR normuanut akuersissut taamaallaat tunniunneqarsinnaavoq, suliffeqarfik:

- 1) aningaasaatileqatigiiffiuppat Kalaallit Nunaanni angerlarsimaffeqartoq, aamma
- 2) akiliisinnaajunnaarnermik, akiliisinnaannginnermik imaluunniit atorunnaarsitsinissaq pillugit suliaqarfigineqanngitsumut,

Imm. 2. Takornariartitsinermik ingerlatamut akuersissut ingerlatsivinnut aningaasaliiffiusunut taamaallaat tunniunneqarsinnaavoq,

- 1) ingerlatseqatigiiffiup aningaasaataasa minnerpaamik 2/3-ii inunnit § 7, nr. 1- 3-mi piumasqaatinik naammassinnittunit toqqaannartumik toqqaannanngitsumilluunniit pigineqarpata, aamma
- 2) aningaasaatileqatigiiffimmi taasisinnaatitaanermut piginnaatitaaffiit minnerpaamik 2/3-ii toqqaannartumik toqqaannanngitsumilluunniit inunnit, § 7, nr. 1-3-mi piumasqaatinik naammassinnittunit pigineqarpata.

10. § 11 ima oqaasertalerneqassaaq:

” **§ 11.** Suliffeqarfinnut inatsisartut inatsisaata atortuulersinneqarfiani pilersinneqareersimasunut, tak. § 18, imm. 2, immikkut ittumik pisoqartillugu § 7, nr. 1 aamma 2-mi, § 8, imm. 2-mi nr. 1-imi, aamma 2-mi, §§ 9-10-mi kiisalu piumasqaataasunit aamma inatsisartut inatsisaani matumani § 5 malillugu aalajangersakkanit aalajangersarneqartunik Naalackersuisut immikkut akuersissuteqarsinnaapput. Immikkut

akuersissut ukiuni tallimani atuuppoq, qinnuteqarnikkulli qinnuteqarnerit tamaasa ukiut marluk tikillugit sivitsorneqarsinnaalluni. Immikkut akuersissummut, tassungalu sivitsuinnermut Naalakkersuisut piunasaqaatinik aalajangersaasinnaapput.”

Imm. 2. Imm. 1 malillugu immikkut akuersissutinut piunasaqaatinut, suleriaasissanullu Naalakkersuisut malittarisassanik ersarinnerusunik aalajangersaasinnaapput.”

11. § 11-p kingorna kapitali 7 sioqqullugu ilanngunneqassaaq:

“Sumiiffinnut immikkut akuersinissamut immikkut periarfissat

§ 11 a. Sumiiffinni takornariartitsinermik ingerlatanik pilersitsiviusimanngitsuni imaluunniit ingerlatsisut imak ikitsigimmata takornariartitsinermik ingerlatat piunaneqarnerat matussuserneqarsinnaanani, takornarialerinermik ingerlatsinernut § 7, nr. 1 aamma 2-mi, § 8, imm. 2 nr. 1, 2,-mi piunasaqaataasunit Naalakkersuisut immikkut akuersissuteqarsinnaapput.

Imm. 2. Imm. 1 malillugu immikkut akuersissut ukiuni pingasuni atuuppoq. Qinnuteqarnikkut immikkut akuersissut ukiut marlukkaarlugit sivitsorneqarsinnaavoq.

§ 11 b § 11 malillugu immikkut akuersissutit pillugit Naalakkersuisut malittarisassanik ersarinnerusunik aalajangersaasinnaapput.”

12. Kapitel 9 ima oqaasertalerneqassaaq:

”Kapitali 9

Inuussutissarsiutigalugu ingerlatanut aamma inunnut nunami angalasunut imaluunniit akunnittunut zonenut immikkoortiterineq

§ 15. Inuussutissarsiutigalugu ingerlataqarneq, takornariartitsinermik ingerlataqarneq kiisalu inuit angalanerat aamma akunninnerat, tak. § 1, imm. 1-3, taamaallaat sumiiffinni erseqqinnerusumik taasani, piffissami erseqqinnerusumik aalajangersarneqartuni imaluunniit piunasaqaatinik immikkut ittunik eqqortitsinikkut taamaallaat pisinnaaneri pillugit, sumiiffinnillu taakkuninnga toqqaanermut atatillugu suleriaatsit suut atuunnersut pillugit Naalakkersuisut malittarisassanik ersarinnerusunik aalajangersaasinnaapput. Malittarisassat taamak ittut, tamanut saqqummiussinerup siusinnerpaamik qaammatit 18-it kingorna atuutsilersinnaapput.

Imm. 2. Naalakkersuisut malittarisassanik ersarinnerusunik aalajangersaasinnaapput inuit Kalaallit Nunaanni aalajangersimasumik najugaqanngitsut angallavinni, sumiiffinniluersarinnerusumik toqqaakkani:

- 1) asimi pisuttuarnissat, angalanissat imaluunniit akunninnissat angalanissaq imaluunniit akunninnissaq sioqqullugu nalunaarutigissagaat,
- 2) asimi pisuttuarnissamut uppersaammik imaluunniit isernissamut uppersaammik

kommunalbestyrelsimit tunniunneqartussamik pissarsissasut,
3) angallavinni aamma sumiiffinni toqqakkani asimi pisuttuarnernut, angalanernut imaluunniit akunninnernut asimi pisuttuarnissamut uppernarsaammik imaluunniit akunninnissamut uppernarsaammik aamma matussusiisumik angalanernut sillimmasiissummik imaluunniit annaanneqarnissamut sillimmasiissummik atuuttumik nassataqassasut, piumasarineqartillugulu oqartussanut taakkua takutissallugit.”

13. § 16, nr. 1, ima oqaasertalerneqassaaq:

” **§ 16.** Inummut tulluuttunik iliuseqartumut Kalaallit Nunaanni Pinerluttulerinermi inatsimmi malittarisassat malillugit akiliisitsissummik akiliisitaasussanngortitsisoqarsinnaavoq:

1) §§ 3, imm. 1 aamma 4 a malillugit takornariartitsinermik ingerlataqarnissamut akuersissummik atuuttumik peqarani takornariartitsinermik ingerlataqartumut.”

§ 2

Inatsisartut inatsisaat ulloq 1. juli 2026-mi atuutilissaaq.

Imm. 2. Manna tikillugu § 11 atuuttoq malillugu piffissaligaasumik akuersissutit 1. juli 2026 sioqqullugu tunniunneqartut, ullormiillu tunniunneqarfiinit annerpaamik ukiuni marlunni atuuttut, aalajangiinerni ataasiakkaani allatigut piumasaqaatitaqanngippat, immikkut akuersissutip piffissaq aallaqqaataanit tunniunneqarfianit ukiuni tallimani atuuttussanngorlugit annertunerusumik iliuseqarfigineqanngitsumik sivitsorneqassapput.

Imm. 3. Suliffeqarfimmi pissutsit annertuumik allanngorpata imaluunniit immikkut akuersissummi piumasaqaatinik suliffeqarfik annertuumik unioqqutitsisimappat Naalackersuisut aalajangersinnaapput, imm. 2 malillugu aallaqqaataanit piffissap saniatigut immikkut akuersissut sivitsorneqassanngitsoq.

Namminersorlutik Oqartussat, ulloq yy 20xx

Naalackersuisut Siulittaasuat